

• sawcuenh •

Gyaepgaemh

□ Yiz Ciz / 余 执

Bihaenx seizcin, bien Dah-yougyangh goleux va hai hoengz-fwgfwg, fwenleux gyukrwdrd, dauq-cawq dwg gij heiq angqyangz haenx, hawj vunz simhai.

A si gungh' anhgiz ginghamdadi youq baihgwnz caeuq gag dieg vangjanh (网安)、hingzcinh (刑侦)、dwzgingi (特警)、gicinh (技侦) daengj lai cungj gingjcaz caeuq suivu bumwnz maedsaed boiqhab baihlaj, bae daengz Yinznanz、Gveicouh、Huznanz、Gyanghsuh、Gvangjdungh daengj cib lai aen sengj, ginggvaq sam ndwen lai ngoenzhwnz mbouj yietnaiq, cawzliux aen anq deuz suiq ndeu, gyaep dauq ngaenz suiq 41767043.15 maenz, gaemhdawz vunzfamh 8 boux. Aen anq neix gyau hawj dangdieg genjcaz gihgvanh cawqleix.

Youq gyaepgaemh caz ra aen anq neix ndawde, gyoengq minzgingi mbouj faen ngoenzhwnz, mbouj lau haemzhoj, yienh ok le gij siengqyienh yinzminz gingjcaz gyaundeideu.

It. Dungjswcangj Okgeiq Guh Saeh Rwx B Gunghswh Gwn Suiq Seiq Cien Fanh

Saeh haidaeuz, bihaenx seiznit ngoenz he, gwnz dou hung B gunghswh hoij miz geij mbaw baengznding, mbaw he gwnzde sij naeuz: "Ngaenzhangz mbouj cuengq ngaenz, gunghswh yaek gven dou, cwngfuj mbouj bangcoh, vunzhong yaek dai iek." Mbaw he gwnzde sij naeuz: "Dieg neix dieg duzguk, duzbyuk gwn duznengz, cwngfuj mbouj okrengz, doxceng mbouj swnsim."

Bouxdaeuz A si siveij caeuq sicwngfuj ndaej aen siusik neix, youq mbouj onj saekdi, gyoengqde baenzlawz hix naemj mbouj daengz B gunghswh guh ok gij saeh neix.

A si gunghyezyenz miz seiqcib lai aen gunghswh, aenaen miz sam cien lai boux vunzhong, B gunghswh yienghneix nauh, gig vaiq couh

gingdoengh daengz gij gunghswh wng bae. Siveij suhgi caeuq sicangj doxyaeng naeuz: "Aeu gibseiz cawqleix ndei gienh saeh B gunghswh neix cij ndaej, mboujnex aenaen gunghswh cungj yienghneix nauh, gij gunghyez aen si raeuz couh luenh lo."

Sicangj roengz lingh: Gak aen bumwnz doxgven aeu vaiqdi baij vunz daengz B gunghswh bae caeuq bouxdaeuz B gunghswh doxyaeng baenzlawz guh. Roengzbae guh saeh seiz aeu miz leix gangj leix, gyoengqde miz maz iugouz aeu caenhiengh muenx-cuk, hawj gij saeh hung bienqbaenz saeh iq bae, gij saeh iq dangguh saeh hung bae banh.

B gunghswh dungjswcangj Liuzcaet dwg ndaek vunz ndang sang ndeu, de naj seiqcingq, da ndaemndat, cim vunz seiz couh lumj yaek dawz vunz haeb gwn ndip nei. De mbouj rox geijlai saw, dingqnaeuz cij doeg gvaq siujyoz couh okrog dajgoeng lo, seizneix de ngaenz lai hwet geng, gangj vah rengzrwgrwg, gig noix dawz vunz cuengq youq ndaw lwgda. De rox cwngfuj yaek daeuj doxyaeng lo, heuh gunghcangj dingz hong roengzdaeuz, youq ndaw gunghswh baij sam bak lai daiz byaek, sam cien lai boux vunzhong caeuq geijcib bouxdaeuz gunghswh, guhdaih gwn laeuj gwn noh, laebdaeb sam ngoenz hemqswdswd.

Seizhaenx daengx biengz gaicawx seng'eiq cungj mbouj ndei, ngaenzcienz souhaeuj mbouj gibseiz, gunghcangj giyez yungh ngaenz sinhoj, ngaenzhangz cuengq ngaenz, miz cuengq okbae nanz ndaej sou doxdaeq, couh mbouj gamj caiq cuengq. B gunghswh hix doxdoengz, doxgaiq gai mbouj okbae, ngaenzhangz youh mbouj cuengq ngaenz, gunghswh bungz daengz baihindaw doxgaiq daeb rim lumj goengqbya, baihgrog ra ngaenz daeuj sai mbouj miz loh. Dungjswcangj Liuzcaet bae ra gvaq cwngfuj, daengx biengz yienghneix, cwngfuj hix mbouj miz banhfap, cij ndei heuh de cajcaj gonq, baez caj couh dwg bi lai gvaqbae, gunghswh couh yaek "goenq saihoz" lo. Liuzcaet nyinhnaeuz mbouj guh di saeh ok da ok naj hawj vunz yawj mbouj ndaej.

Suhgi, sicangj caeuq gij bouxdaeuz bumwnz doxgven daengz B gunghswh, Liuzcaet vut naj gvaq henz bae, coenz vah ndeu naeuz: "Dawz saeh banh ndei caiq gangj vah, mbouj banh ndei saeh couh bae caeuq gyoengq vunzhong gwn laeuj guh-anq ba."

Ngoenzneix Liuzcaet lumj ndaek mabag nei, couh lienz suhgi caeuq sicangj hix mbouj cuengq haeuj ndaw lwgda, gij saeh couh yienghneix yied nauh yied hung, yied nauh yied naek.

B gunghswh dwg aen giyez guh lijhozginh daengx sengj cei q hung ndeu, dwg aen hanghmoeg buek daih' it daj baihgrog yinx haeuj A si daeuj. Gunghswh ciemq dieg ngeihcib lai fanh aen bingzfueng, gij ranz gunghcangj geiz daih' it couh guh liux cibhaj fanh lai bingzfueng. Gunghswh youq gunghyezyenz guhbaenz haihong le, it bi ndaej guh ok lijhozginh bet fanh lai dun, gij lijhozginh B gunghswh hab dawz bae cang ranz-youq, sanghcangz, binhguenj, diemqlaeuj daengjdaengj, miz sam bak lai giz gai lijhozginh faen youq daengx guek gak dieg, lij gai daengz Yeznanz、Alahboz、Nogzlozswh daengj ngeihcib lai aen guekgya bae. Youq ndaw doengzhangz, gij doxgaiq B gunghswh dwg gai ndaej cei q okfwngz, B gunghswh daengx bi hix hawj guekgya gyau suiq haj cien lai fanh maenz.

Aen gunghswh baenzneix ndei, baenzlawz yienghneix nauh saeh ni? Baenzlawz yienghneix gamj caeuq cwngfuj sik naj ne? Mizmbangj bouxdaeuz naeuz: "B gunghswh dwg duzmax roet lai ndang rengz, bouxvunz ngaenz lai vah geng."

Mizmbangj bouxdaeuz naeuz: "Cangh lawz cangh mbouj gwn faex, sae lawz sae mbouj gwn namh, gangj mbouj dingh B gunghswh hix guh maz saeh rwx cij miz ngaenz bw."

Gyoengqvunz yienghneix gangjriu guhcaemz, A si gyoengq bouxdaeuz hix roxnyinh miz dauhleix. Naemj gig vaiq cawqleix B gunghswh gienh saeh neix, aeu vat daengz ndaw dungx ndaw saej de bae cij ndaej. Vah bouxgeq naeuz: Moeb ngwz moeb caet conq, donj nya aeu donj rag.

Ciepdauj, A si baij sam boux ganbu suivu bumwnz bae B gunghswh "bang hong", guhcaeg bae caz B gunghswh, caen dwg mbouj caz mbouj rox, baez caz yaek goenq hoz.

Miz bi ndeu, vih aeu demlai souhaeuj, B gunghswh dungjswcangj Liuzcaet heuh caizvu ginghlij Siuh-roek daengj geij boux daeuj doxyaeng, siengj banhfap baenzlawz gemjnoix sawjngaenz caeuq baenzlawz demlai souhaeuj, Liuzcaet naeuz: "Baezlaeng gij lijhozginh gai okbae haenx, buek lawz ndaej yaem suiq couh caenhiengh yaem suiq." Siuhroek ndaej vah dungjswcangj le, haihij youq gwnz bouh gunghswh souhaeuj haenx guh dinfwngz: Gij hek lawz aeu hai biuq, couh doenggvaq canghu gunghswh sou ngaenz, ciuq gij ngaenz ndaw gunghswh canghu bae gyau suiq; gij hek lawz mbouj yungh hai biuq, dawz ngaenz dwk daengz ndaw canghu Lijhaj caeuq Mungzseiq bae, gij ngaenz neix couh mbouj yungh gyau suiq lo.

B gunghswh dauqdaej yaem bae

geijlai suiq, aeu miz caensaed soqgawq cij ndaej dingh coih. A si gozgyah suivugiz dawz B gunghswh yaem suiq gienh saeh neix gyau hawj A si gungh' anhgiz ginghamdadi, ginghamdadi daui cieq anq le, roxnyinh gienh saeh neix daiq naek, mbouj gamj rubrab roengzfwngz. Ginggvaq haihoih gietdingh, ginghamdadi daui caiq baij vunz bae B gunghswh caz, caz rox B gunghswh daj moux nienz moux nyied hwnj daengz moux nienz moux nyied ndawde, dungjswcangj Liuzcaet heuh gij vunz gaem soq ndaw gunghswh guh dinfwngz, caemh yaem suiq 41767043.15 maenz. Caz ok B gunghswh miz coih le, ginghamdadi daui gietdingh ganjvaiq roengzfwngz bae laeh ngaenz caeuq gaemh vunz.

Ngeih. Saehcingz Vang Raeh Doxsan Gwnz Roen Caz Anq Boemz Hoengq

A si gungh' anhgiz daj ginghamdadi, hingzeinh, vangjanh caeuq gak dieg baicuzsoj senj aeu 50 boux minzgingi gapbaenz aen cuj 110 ndeu, youz ginghamdadi daui daduicangj Liu Gen guh daeuz. Liu Gen ndang hungsang, naj miz di ndaem, de banhsaeh miz gyaeuj miz rieng, mbouj faen beixnuengx baengzyoux, vunz heuh de guh—gingjcaz najndae, de youq gungh' anhgiz guhhong ndaej 20 lai bi, doiq gyaepgaemh gak cungj gak yiengh vunzfamh gig miz gingniemh. 110 siujcuj laebbaenz le, lienzhwnz haihoih doxyaeng baenzlawz guh.

Doiq gienh saeh neix gyoengq gingjcaz cungj nyinhnaeuz: "B gunghswh dwg aen giyez ndaw guek rog guek cungj mizmingz ndeu, gunghswh dungjswcangj Liuzcaet baihgwnz baihlaj baihindaw baihgrog cungj miz vunz, de youh mbouj dingq vah bouxwnq, raeuz naemj heuh de gangj saeh cungj sinhoj, seizneix yaek bae lumh caekhaex de, engq nanz ndaej doenghfwngz, daihgva aeu gaemfwngz hwnjdaeuj, daengz gunghswh de bae, caz ra gij soq ndaw gunghswh de, caemhcai q vaiqdi fung hwnjdaeuj." (1)